



Iesus par la similitude du Samaritain, qui donne secours à un homme inconnu, enseigne la charité envers le prochain.

P O V R montrer qu'il faut faire bien à tous, & mesmement aux inconnus, Iesus répondant à celuy qui se vouloit iustifier, & qui demandoit, Et qui est mon prochain ? il luy dist : Vn homme descendoit de Ierusalem en Iericho, & cheut entre les brigands, lesquels le dépouillèrent & l'ayans navré s'en allerent, le laissant demy-mort. Or par rencontre vn Sacrificateur descendoit par le mesme chemin, & quand il le vit il passa de l'autre costé : aussi vn Leuite estant arriué à l'endroit, & le voyant, passa outre : mais vn Samaritain en eut compassion, & s'approchant luy reserra ses playes, & y mit de l'huile & du vin : puis le posa sur sa beste, le mena en l'hostellerie, & le pensa ; & le lendemain au partir il tira deux deniers, & les bailla à l'hoste, & luy dist : Pensez-le, & tout ce qu'il dépensera dauantage ie le rendray à mon retour. Lequel des trois (dit Iesus) te semble estre le prochain à celuy qui tomba entre les brigands ? Et il luy dist, Cettuy qui a usé de misericorde envers luy. Et Iesus luy dist, Va-t'en, & fais le semblable.